

四庫全書

集部

欽定四庫全書

御定全唐詩卷八百八十一

李瀚

唐末五代人

蒙求

王戎簡要裴楷清通孔明臥龍呂望非熊楊震關西丁
寬易東謝安高潔王導公忠匡衡鑿壁孫敬閉戶邳都
蒼鷹甯成乳虎周嵩狼抗梁冀跋扈郗超髯參王珣短
簿伏波標柱博望尋河李陵初詩田橫感歌武仲不休

士衡患多桓譚非識王商止訛嵇呂命駕程孔傾蓋劇
孟一敵周處三害胡廣補闕袁安倚賴黃霸政殊梁習
治最墨子悲絲楊朱泣岐朱博烏集蕭芝雉隨杜后生
齒靈王出髭賈誼忌鵬莊周畏犧燕昭築臺鄭莊置驛
璿靖二妙岳湛連璧郗詵一枝戴馮重席鄒陽長裾王
符逢掖鳴鶴日下士龍雲間晉宣狼顧漢祖龍顏鮑靚
記井羊祜識環仲容青雲叔夜玉山毛義捧檄子路負
米江草忠孝王覽兄弟蕭何定律叔孫制禮葛豐刺舉

息躬歷詆管寧割席和嶠專車時苗留犢羊續懸魚樊
噲排闥辛毗引裾孫楚漱石郝隆曬書枚臯詣闕充國
自贊王衍風鑑許劭月旦賀循儒宗孫綽才冠太叔辨
洽摯仲辭翰山濤識量毛玠公方袁盎却座衛瓘撫牀
于公高門曹參趣裝庶女振風鄒衍降霜范丹生塵晏
嬰脫粟詰汾興魏鼈靈王蜀不疑誣金卞和泣玉檀卿
沐猴謝尚鵠鵠泰初日月季野陽秋荀陳德星李郭仙
舟王忱繡被張氏銅鈎丁公遽戮雍齒先侯陳雷膠漆

范張雞黍周侯山嶷會稽霞舉季布一諾阮瞻三語郭
丈游山袁宏泊渚黃琬對日秦宓論天孟軻養素楊雄
草玄向秀聞笛伯牙絕絃郭槐自屈南郡猶憐魯恭馴
雉宋均去獸廣客蛇影殷師牛鬪元禮模楷季彥領袖
魯褒錢神崔烈銅臭梁竦廟食趙溫雄飛枚乘蒲輪鄭
均白衣陵母伏劒軻親斷機齊后破環謝女解圍鑿齒
尺牘荀勗音律胡威推謙陸績懷橘羅含吞鳥江淹夢
筆李欽清貞劉驎高率蔣詡三徑許由一瓢楊僕移關

杜預建橋壽王議鼎杜林駁堯西施捧心孫壽折腰靈
輒扶輪魏顆結草逸少傾寫平子絕倒澹臺毀薛子罕
辭寶東平為善司馬稱好公超霧市魯般雲梯田單火
牛江迫燕雞蔡裔殞盜張遼止啼陳平多轍李廣成蹊
陳遵投轄山簡倒載淵客泣珠交甫解佩龔勝不屈孫
寶自劾呂安題鳳子猷訪戴董宣強項翟璜直言紀昌
貫蟲養由號後馮衍歸里張昭塞門蕪韶鬼靈盧充幽
婚震畏四知秉去三惑柳下直道叔敖陰德張湯巧詆

杜周深刻三王尹京二鮑糾慝孫康映雪車屑聚螢李
充四部井春五經谷永筆札顧愷丹青戴逵破琴謝敷
應星阮宣杖頭畢卓甕下文伯羞鬘孟宗寄鮓史丹青
蒲張湛白馬隱之感鄰王修輟社阮放八雋江泉四凶
華歆忤旨陳羣蹇容王濬懸刀丁固生松姜維膽斗盧
植音鐘桓溫奇骨鄧艾大志楊修捷對羅友默記杜康
造酒蒼頡制字擣里智囊邊韶經笥滕公佳城王果石
崖買妻恥醢澤室犯齋馬后大練孟光荆釵顏叔秉燭

宋弘不諧鄧通銅山郭況金穴秦彭攀轅侯霸臥轍淳
于炙輠彥國吐屑太真玉臺武子金埒巫馬戴星宓賤
彈琴郝康留錢雷義送金逢萌挂冠胡昭投簪王喬雙
鳧華佗五禽程邈隸書史籀大篆王承魚盜丙吉牛喘
賈琮褰帷郭賀露冕馮媛當熊班女辭輦王充閱市董
生下帷平叔傅粉弘治凝脂楊生黃雀毛子白龜宿瘤
采桑漆室憂葵韋賢滿籬夏侯拾芥阮簡曠達袁耽俊
邁蕪武持節鄭衆不拜郭巨將坑董永自賣仲連蹈海

范蠡泛湖文寶緝柳溫舒截蒲伯道無兒嵇紹不孤綠
珠墜樓文君當壚伊尹負鼎甯戚叩角趙壹坎壈顏駟
蹇剝龔遂勸農文翁興學晏御揚揚五鹿嶽嶽蕭朱結
綬王貢彈冠龐統展驥仇覽栖鸞葛亮顧盧韓信升壇
王褒柏慘閔損衣單蒙恬製筆蔡倫造紙孔伋緼袍祭
遵布被周公握髮蔡邕倒屣王敦傾室紀瞻出妓暴勝
持斧張綱埋輪靈運曲笠林宗折巾屈原澤畔漁父江
濱魏勃埽門潘岳望塵京房推律翼奉觀性甘寧奢侈

陸凱貴盛干木富義於陵辭聘元凱傳癖伯英草聖馮
異大樹千秋小車漂母進食孫鍾設瓜壺公謫天薊訓
歷家劉玄刮席晉惠聞墓伊籍一拜酈生長揖馬安四
至應璩三入郭解借交朱家脫急虞延剋期盛吉垂泣
豫讓吞炭鉏麋觸槐阮孚蠟屐祖約好財初平起石左
慈擲杯武陵桃源劉阮天台王儉墜車褚淵落水季倫
錦障春申珠履甄后出拜劉楨平視胡嬪爭擣晉武傷
指石慶數馬孔光溫樹翟湯隱搽許詢勝具優旃滑稽

落下厯數曼容自免子平畢娶師曠清耳離婁明目仲
文照鏡臨江折軸藥巴喫酒偃師舞木德潤傭書君平
賣卜叔寶玉潤彥輔冰清衛后髮鬚飛燕體輕玄石沈
湏劉伶解醒趙勝謝臂楚莊絕纓惡來多力飛廉善走
趙孟疵面田駢天口張憑理窟裴頠談數仲宣獨步子
建八斗廣漢鉤距弘羊心計衛青拜幕去病辭第酈寄
賣友紀信詐帝濟叔不癡周兄無慧虞卿擔簦蘓章負
笈南風擲孕商受斲涉廣德從橋君章拒獵應奉五行

安世三篋相如題柱終軍棄繻孫晨稿席原憲桑樞端
木辭金鍾離委珠季札挂劍徐穉致芻朱雲折檻申屠
斷鞅衛玠羊車王恭鶴氅管仲隨馬蒼舒稱象丁蘭刻
木伯瑜泣杖陳達豪爽田方簡傲黃向訪主陳寔遺盜
龐儉鑿井陰方祀竈韓壽竊香王濛市帽句踐投醪陸
抗嘗藥孔愉放龜張顥墮鵲田豫儉素李恂清約義縱
攻剽周陽暴虐孟陽擲瓦賈氏如臯顏回簞瓢仲蔚蓬
蒿康竺收資桓景登高雷煥送劍呂虔佩刀老萊斑衣

黃香扇枕王祥守柩蔡順分棹淮南食時左思十稔劉
惔傾釀孝伯痛飲女媧補天長房縮地季珪士首長孺
國器陸玩無人賈詡非次何晏神伏郭奕心醉常林帶
經高鳳漂麥孟嘉落帽庾凱墮幘龍逢板出張華台圯
董奉活爨扁鵲起號寇恂借一何武去思韓子孤憤梁
鴻五噫蔡琰辨琴王粲覆棋西門投巫何謙焚祠孟嘗
還珠劉昆反火姜肱共被孔融讓果端康相代亮陟隅
坐趙倫鷗怪梁孝牛禍桓典避馬王尊叱馭鼃錯峭直

趙禹廉倨亮遺巾幘備失匕箸張翰適意陶潛歸去魏
儲南館漢相東閣楚元置醴陳蕃下榻廣利泉湧王霸
冰合孔融坐滿鄭崇門雜張堪折轅周鎮漏船郭伋竹
馬劉寬蒲鞭許史侯盛韋平相延雍伯種玉黃尋飛錢
王允千里黃憲萬頃虞駿才望戴淵鋒穎史魚黜殯子
囊城郢戴封積薪耿恭拜井汲黯開倉馮驩折券齊景
駟千何曾食萬顧榮錫炙田文比飯稚珪蛙鳴彥倫鶴
怨廉頗負荆須賈擢髮孔翊絕書申嘉私謁淵明把菊

真長望月子房取履釋之結韞郭丹約關祖逖誓江賈
逵問事許慎無雙婁敬和親白起坑降蕭史鳳臺宋宗
雞窗王陽囊衣馬援蒼涼劉整交質五倫十起張敞畫
眉謝鯤折齒盛彥感蠮姜詩躍鯉宗資主諾成璿坐嘯
伯成辭耕嚴陵去釣董遇三餘譙周獨笑將閭仰天王
凌呼廟二疏散金陸賈分橐慈明八龍彌衡一鶚不占
隕車子雲投閣魏舒堂堂周舍諤諤無鹽如漆姑射若
冰邾子投火王思怒蠅符朗皐白易牙溜澠周勃纖薄

一作
畚非

灌嬰販繒馬良白着阮籍青眼黥布開關張良燒

棧陳遺飯感陶侃酒限楚昭萍實東哲竹簡曼倩三冬
陳思七步劉寵一錢廉范五袴汜毓字孤郝鑒吐哺苟
弟轉酷嚴母埽墓洪喬擲水陳泰挂壁王述忿狷荀粲
惑溺宋女愈謹敬姜猶績鮑照篇翰陳琳書檄浩浩萬
古不可備甄美繁據華爾曹勉旃

御定全唐詩卷八百八十一

欽定四庫全書

御定全唐詩卷八百八十二

褚亮

詩一首

宗廟九德之歌辭

第七句第十三句各缺一字

皇祖誕慶於昭于天積德斯遠茂攸緒先維文應歷神
武弘宣肇迹水成功坂泉道光覆載聲穆吉先式備
犧象用牲牲禮終九獻樂展四懸神貺景福遐哉永
年

陳叔達

詩一首

太廟裸地歌辭

清廟既裸鬱鬯推禮大哉孝思嚴恭祖禰龍衮以祭鸞
刀思啓發德朱弦升歌丹陛遙享粢盛堂斟況齊降福
穰穰來儀濟濟

王績

詩一首

堦前石竹

上天布甘雨萬物咸均平自顧微且賤亦得蒙滋榮萋

萋結綠枝暍暍垂朱英常恐零露降不得全其生歎息
聊自思此生豈我情昔我未生時誰者令我萌棄置勿
重陳委化何所營

崔善為

詩一首

九月九日

九日重陽節三秋季月殘菊花催晚氣萸房辟早寒霜
濃鷹擊遠霧重雁飛難誰憶龍山外蕭條邊興闌

許敬宗

詩二首

奉和九月九日應制

爽氣申時豫臨秋肆武功太液榮光發曾城佳氣融紫
霄寒暑麗黃山極望通講義遵先軌覩德暢宸衷驚嶺
飛夏服娥魄亂雕弓汗浹流赭塵生埒散紅飲羽驚
開石中葉遽凋叢雁殫雲路靜烏墜日輪空九流參廣
宴萬寓抃恩隆

奉和守歲應制

玉琯移玄序金奏賞彤闡祥鸞歌裏轉春燕舞前歸壽

爵傳三禮燈枝麗九微運廣薰風積恩深湛露晞送寒
終此夜延宴待晨暉

盧照隣

詩一
首

凌晨

日掩鴻都夕河低亂箭移蟲飛明月戶鵲繞落花枝蘭
襟帳北壑玉匣鼓文漪間有啼鶯處暗幄曉雲披

宋之問

詩二
首

登北固山

京鎮周天險東南作北關埭橫江曲路戍入海中山望
越心初切思秦鬚已斑空憐上林雁朝夕待春還

陪羣公登箕山賦得羣字

許由去已遠冥莫見幽墳世薄人不貴茲山唯白雲寧
知三千歲復有堯為君時佐激頽俗登箕挹清芬高節
雖旦暮邈與洪崖羣

蘓頔詩二
首

人日兼立春小園宴

黃山積高次表裏望京邑白日最靈朝登攀盡原隰年
灰律象動陽氣開迎入煙靄長薄含臨流小溪澀賓朋
莫我棄詞賦當春立更與韶物期不孤東園集

和黃門舅十五夜作

聞君陌上來歌管沸相催孤月連明照千燈合暗開寶
裝遊騎出香繞看車迴獨有歸閑意春庭伴落梅

薛曜詩三首

登綿州富樂山別李道士策

珠闕崑山遠，銀宮漲海懸。
送君從此路，城郭幾千年。
雲霧含丹景，桑麻覆細田。
笙歌未盡曲，風馭獨冷然。

九城尋山水

菊浦桃源瞰九城，鸞歌鳳嘯忽將迎。
千巖雜樹雲霞色，百道流泉風雨聲。
上客由來軒蓋重，幽人自覺薜蘿輕。
疑是昔年棲息地，山中日暮有餘情。

却山古意

昔掩佳城路，曾驚壑易遷。
今接宜都里，翻疑海作田。
鏤

鼎名應大生金字不傳風
飈吹白日羅綺拭黃泉
象鳳笙留國成龍劍上天
長樂移新壘咸陽失舊阡
川流徒漫漫神理竟綿綿
佇見飛來鶴沈嗟不學仙

李懷遠詩一首

鳳閣南廳槐樹半生死
雖遇陽和終呈枯朽託
根清禁頗覺非宜感物緣情率爾為詠

庭槐歲月深半死尚抽心
葉少寧障日枝疎不礙禽
帷幄諒無取棟梁非所任
槐在龍樓側羞處鳳池陰
未能

辭雨露猶得款衣簪惜悲生意盡空餘古木吟

趙彥伯詩一

和九月九日登慈恩寺浮圖應制

出豫垂佳節憑高陟梵宮
皇心滿塵界佛迹現虛空
日月宜長壽天人得大通
喜聞題寶偈受記莫由同

喬備詩一

秋夜巫山

巫峽裴回雨陽臺淡蕩雲
江山空窈窕朝暮自紛氤

色寒秋露猿啼清夜聞誰憐夢魂遠腸斷思紛紛

孫逖

詩一首

晦日與盧舍人同詣補闕城南林園

第六句缺一字

芳年正月晦假日早朝迴欲盡三春賞還欽二阮才柳
迎郊騎入花近庭開宛是人寰外真情寓物來

盧象

詩一首

贈劉藍田

一作王維詩

籬中犬迎吠出屋候柴扉歲晏輸井稅山村人暮歸晚

田始家食餘布成我衣對此能無事勞君問是非

劉長卿

詩一首

清明日青龍寺上方

得多字

上方偏可適季月况堪過遠近人都至東西山色多少
陽留逕草新葉變庭柯已度清明節春愁如客何

蕭穎士

詩三首

羽山

九山方蕩濶三考佇良材夏祖何屯圯遷殛此山隈空

餘下泉客誰復辨黃能

遊馬耳山

茲山表東服遠近瞻其名合沓盡溟漲渾渾連太清我
來疑初伏幽路無炎精流水出溪盡覆蘿搖風輕高深
變氣候俯仰暮天晴入谷煙雨潤登嵯雲日明乾坤正
含養種植總滋榮草樹皆秀色雛麋亂新聲攀巖挹桂
髓洞穴拾瑤英此地隱微逕何人得長生宿心尚葛許
彌願棲蓬瀛太息宦名路遲迴忠孝情還丹昧遠術養

素慚幽貞安得從此去悠然昇玉京

趙載同遊焦湖夜歸作

題缺三字
詩缺八字

將澤國湖騰迎淮甸東江輸大江別流從此縣仙
尉俯勝境輕橈恣遊衍自公暇有餘微尚得所願拈引
閒翰墨風流盡歡宴稍移井邑閑始悅登眺便遙岫逢
應接連塘乍迴轉劃然氣象分萬頃行可見波中峯一
點雲際帆片片浩歎無端涯孰知蘊虛變往遊信不厭
畢景方未還蘭煙靄裏延緣蒲稗間勢隨風潮遠心

與閒迴見出浦月雄光射東關悠然蓬壺事

衰顏安得傲吏隱彌年寓茲山

王翰

詩一首

龍興觀金籙建醮

景龍二年末句缺三字

泰山巖巖兮凌紫氛中有羣仙兮乘白雲陳金薦璧兮

張鼎

詩一首

山中松

枝聳碧雲端根侵鮮壁盤幾經良匠顧猶作散材看雪
積花開少風多子落乾空存後凋色歲晚出林巒

李白

詩一首

庭前晚花開

西王母桃種我家三千陽春始一花結實苦遲為人笑
攀折唧唧長咨嗟

杜甫

詩一首

漢州王大錄事宅作

南溪老病客相見下肩輿近髮看烏帽催尊煮白魚宅
中平岸水身外滿牀書憶爾才名叔含悽意有餘

皇甫冉

詩七
首

田家作

卧見高原燒閒尋空谷泉土膏消臘後麥隴發春前藥
驗桐君錄心齊莊子篇荒村三數處衰柳百餘年好就
山僧去時過野舍眠汲流寧厭遠卜地本求偏向子諧
樵路陶家置黍田雪峯明晚景風雁急寒天且復冠名

鷗寧知冕戴蟬問津夫子倦荷蓀丈人賢顧物皆從爾
求心正儻然稽康嬾慢性祇自戀風煙

寄劉方平

十年不出蹊林中一朝結束甘從戎嚴子持竿心寂歷
寥落荒籬遮舊宅終日碧湍聲自喧暮秋黃菊花誰摘
每望南峯如對君昨來不見多黃雲石徑幽人何所在
玉泉踈鐘時獨聞與君從來同語默豈是悠悠但相識
天畔三秋空復情袖中一字無由得世人易合復易離

故交棄置求新知歎息青青長不改歲寒霜雪貞松枝
和中丞奉使承恩還終南舊居

軒車尋舊隱賓從滿郊園蕭散煙霞興殷勤故老言謝
公山不改陶令菊猶存苔蘚侵垂釣松篁長閉門風霜
清吏事江海諭君恩祇召趨宣室沈冥在一論

送令狐明府

行當臘候晚共惜歲陰殘間道巴山遠如何蜀路難荒
林蔽積雪亂石起驚湍君有親人術應令勞者安

同韓給事觀畢給事畫松石

海嶠微茫那得到楚關迢遞心空憶夕郎善畫巖間松
遠意幽姿此何極千條萬葉紛異狀虎伏螭盤爭勁力
扶疎半映晚天青凝澹全和曙雲黑煙籠月照安可道
雨濕風吹未曾息能將積雪辨晴光每與連峯作寒色
龍樓不競繇花吐騎省偏宜遙夜直羅浮道士訪移來
少室山僧舊應識掖垣深沈晝無事終日亭亭在人側
古槐衰柳寧足論還對果愚列行植

送從姪棲閑律師

能知出世法詎有在家心
南院開門送東山策杖尋經
年期故里及夏到空林念遠長勞望
朝朝草色深

舟中送李觀

江南近別亦依依
山晚川長客伴稀
獨坐相思計行日
出門臨水望君歸

張彪詩一首

勅移橘栽

南橘北為枳古來豈虛言徙植期不變陰陽感君恩枝
條皆宛然本土封其根及時望栽種萬里繞花園滋味
豈聖心實以憂黎元暫勞致力重永感貢獻煩是嗟草
木類稟異於乾坤願為王母桃千歲奉至尊

御定全唐詩卷八百八十二

欽定四庫全書

御定全唐詩卷八百八十三

嚴維

詩一首

晚霽登王六東閣

試上江樓望初逢山雨晴連空青嶂合向晚白雲生俊
美要殊觀蕭條見遠情情來不可極日暮水流清

顧況

詩四首

曲龍山歌

曲龍丈人冠藕花其顏色映光明砂玉繩金枝有通籍
五嶽三山如一家遙指叢霄皆靈島島中暔暔無凡草
九仙傲倪折五芝翠鳳白麟回異道石臺石鏡月長明
石洞石橋連上清人間妻子見不識拍雲揮手升天行
摩天截漢何瀟灑四石五雲更上下下方小兆更拜焉
願得騎雲作車馬

子欲居九夷乘桴浮於海聖人之意有所在曲龍何在
在海中石室玉堂宵玲瓏其下深怪之所產其上靈棲

復無限無風浪頂高屋脊有風天晴翻海眼願逐剛風
騎吏旋起居按摩參寥天鳳皇頰骨流珠佩孔雀尾毛
張翠蓋下看人界等蟲沙夜宿層城阿母家

柳宜城鵲巢歌

井序

俗傳鵲巢在南令人貧窮多口舌東西家者已斫
樹枝公獨任其乳育於鳥如此於人可知况承命
歌曰

相公宅前楊柳樹野鵲飛來復飛去東家斫樹枝西家

斫樹枝東家西家斫樹枝發遣野鵲巢何枝相君處分
留野鵲一月生得三箇兒相君長命復富貴口舌貧窮
徒爾為

道該上人院石竹花歌

道該房前石竹叢深淺紫深淺紅嬋娟灼爍委清露小
枝小葉飄香風上人心中如鏡中永日垂簾觀色空

耿漳

詩一首

九日

九日強游登藻井髮稀那敢插茱萸橫空過雨千峰出
大野新霜萬壑鋪更望尊中菊花酒殷勤能得幾回沽

竇叔向

詩一首

青陽館望九子山

蒼翠岩堯上碧天九峰遙落縣門前
毫芒映日千重樹涓滴垂空萬大泉
武帝南遊曾駐蹕始皇東幸亦祈年
雲祠絕跡終難訪唯有猿聲到客邊

王季友

詩二首

青出藍

芳藍滋足帛人力半天經浸潤加新氣光輝勝本清還
同冰出水不共草為螢翻覆衣襟上偏知造化靈

皇帝移晦日為中和節

皇心不向晦改節號中和淑氣同風景嘉名別詠歌前
裙移舊俗賜尺下新科歷象千年正醑醕四海多花隨
春令發鴻度歲陽過天地齊休慶歡聲欲蕩波

劉商詩一

首

送劉南史往杭州拜覲別駕叔

兄弟飄零自長年見君眉白轉相憐
清揚似玉須勤學富貴由人不在天
萬里榛蕪迷舊國兩河烽火復相連
林中若使題書信但問漳濱訪客船

楊巨源

詩二首

和汴州令狐相公白菊

兔園春欲盡別有一叢芳
直似窮陰雪全輕向曉霜凝
暉侵桂魄晶彩奪螢光
素萼迎風舞銀房
泣露香水晶

簾不隔雲母扇韜銑紉袖呈瑤瑟冰容啟玉堂今來碧
油下知自白雲鄉留此非吾土須移鳳沼傍

贈陳判官求子花詩

魏府出此物

油地輕綃碧且紅須憐纖手是良工能生麗思千花外
善點穠姿五彩中子細傳看臨霽景殷勤持贈及春風
若將江上迎桃葉一帖何妨錦繡同

歐陽詹

詩一首

同諸公過福先寺律院宣上人房

律座下朝講畫門猶掩關
叨同靜者來正值高雲閑
寂爾方丈內瑩然虛白間
千燈智慧心片玉清羸顏
松色落深井竹陰寒小山
晤言流曦晚惆悵歸人寰

白居易詩三首

城西別元九

城西三月三十日別友辭
春兩恨多帝里却歸猶寂寞
通州獨去又如何

陳家紫藤花下贈周判官

藤花無次第萬朵一時開不是周從事何人喚我來

遊小洞庭

湖山上頭別有湖
芰荷香氣占仙都
夜含星斗分乾象
曉映雷雲作畫圖
風動綵蘋天上浪
鳥棲寒照月中烏
若非神物多靈迹
爭得長年冬不枯

楊衡

詩一首

傷蔡處士

篋中遺草是琅玕
對此令人灑淚看
三逕尚疑行迹在

數螢猶自映書殘
晨光不借泉門曉
暝色空添隴樹寒
欲問皇天天更遠
有才無命說應難

丘丹

詩二首

奉使過石門瀑布

并序

謝康樂宋景平中為永嘉守有宿石門巖上詩予
六代祖梁中書侍郎天監中有過石門瀑布詩後
亦為此郡小子大厯中奉使竊有繼作雖不足克
紹祖德追蹤昔賢蓋造奇懷感之志也

溪上望懸泉耿耿雲中見披榛上巖巖絕壁正東面千
仞瀉聯珠一潭噴飛霰嵯嶇滿山響坐覺炎氛變照日
類虹蜺從風似綃練靈竒既天造惜處窮海甸吾祖昔
登臨謝公亦遊衍王程懼淹泊下磴空延眷千里雷尚
聞巖迴樹蔥蒨奔波一作此來恭賤役探討媿前彥永欲洗
塵纓終當愜茲願

秋夕宿石門館

暝從石門宿搖落四岩空潭月漾山足天河瀉澗中杉

松寒似雨猿鳥夕驚風獨卧不成寐蒼然想謝公

張碧

詩三首

廬山瀑布

誰將織女機頭練貼出青山碧雲面造化工夫不等閑
剪破澄江凝一片怪來洞口流嗚咽怕見三冬晝飛雪
石鏡無光相對愁漫漫頂上沈秋月爭得陽鳥照山北
放出青天豁胸臆黛花新染插天風驀吐中心爛銀色
五月六月暑雲飛閣門遠看澄心機參差碎碧落巖畔

梅花亂擺當風散

林書記薔薇

東風折盡諸花卉是箇亭臺冷如水黃鸝古滑跳柳陰
教看薔薇吐金藥雙成湧出瑠璃宮天香濶罩紅熏籠
西施曉下吳王殿亂拋嬌臉新勻濃瑤姬學繡流蘇幔
綠夾殷紅垂錦段炎洲吹落滿汀雲阮瑤庭前裝一半
醉且書懷還復吟蜀箋影裏霞光侵秦娥晚憑欄干立
柔枝墜落青羅襟殷勤無波綠池水為君作鏡開妝藥

荅友人新栽松

第十一句
缺二字

石門新長青龍髯虬身宛轉雲光粘
間君愛我幽崖前十株五株寒霜天
越溪老僧頭削雪曾云手植當庭月
三十年来遮火雲涼風五月生空門
願君栽於清澗泉貞姿莫迓天桃妍
易開還易落貞姿鬱鬱長依然
山童嬾上孤峯巔當窗劃破屏風煙

陳翥

詩二
首

金錢花

裊露牽風夾瘦莎一星星火遍窠窠
閑門永巷新秋裏幸不傷蕪莫怕多

古蘚寒蕪讓品流小齋多謝伴清幽
若教夷甫門前種也是無多過一秋

長孫佐輔

詩二首

山居雨霽即事

結茅蒼嶺下自與喧卑隔况值雷雨晴
郊原轉岑寂出門看反照繞屋殘溜滴
古路絕人行荒陂響螻蝻籬崩

瓜豆蔓圃壞牛羊跡斷續古祠鴉高低遠村笛喜聞東
臯潤欲往未通屐杖策試危橋攀蘿瞰苔壁隣翁夜相
訪緩酌聊跂石新月出汙尊浮雲在巾舄常隳腐儒操
謬習經邦畫有待時未知非關慕沮溺

秋日登山

逐勝不怯寒秋山閒獨登依稀小徑通深處逢來僧側
石擁寒溜欹松懸古藤明書問知友興詠將誰能

竇鞏

詩一首

自京師將赴黔南

風雨荊州二月天
問人須雇峽中船
西南一望雲和水
猶道黔南有四千

姚合

詩一首

中秋夜洞庭圓月

素月閒秋景
騷人汎洞庭
滄波正澄霽
涼葉未飄零
練彩凝葭蕩
霜容靜杳冥
曉樓河畔鶴
宵映渚邊螢
圓彩含珠魄
微飈發桂馨
誰憐採蘋客
此夜宿孤汀

李涉 詩九首

灘陽行

黃昏日暮驅羸馬
夜宿灘陽烽火下
此地新經殺戮來
墟落無煙空碎瓦
層冰塞斷隋朝水
一道銀河貫千里
愁心翻覆夢難成
病僕呻吟呼不起
泗水三千招義軍
本是征戰邀殊勲
十年麾下蓄壯氣
一朝此地為愁人
昨日太陽回照燭
轉見天心重含育
早晚東風的發生
古堤春草年年綠

六歎

集已載
三首

蓬萊島邊採珠客西望人寰星漢隔千重疊浪聳雲高
萬里平沙連月白海中洞穴尋難極水底蛟人半相識
玄蚌初開影暫明驪龍欲近威難逼辛苦風濤白首期
得珠却恨求珠時隋侯歿世幾千載只今薄俗空嗤嗤
燕王愛賢築金臺四方豪俊承風來秦王燒書殺儒客
肘腋之中千里隔去年八月幽并道昭王陵邊哭秋草
今年二月遊函關秦家城外悲河山河上山邊車馬路

殘日青煙五陵樹

關東病儒客梁城五歲十回逢
亂兵燒人之家食人肉
狼虎熾心都未足城裏愁雲不開城
城頭野草春還綠
五十餘年忠烈臣
臨難守節羞謀身
堂上英髦沈白刃
門前輿隸乘朱輪
千古傷心汴河水
陰天落日悲風起
却歸巴陵途中走筆寄唐知言

去年臘月來夏口
黑風白浪打頭吼
櫓聲軋軋搖不前
看他撩亂張帆走
逾月始到鸚鵡洲
嗚嗚暮角喧城頭

逡巡未得見官長夢寢但覺生愁憂軍中賢倅李監察
人馬曉來兼手札教令參謁禮數全頭頭要處相稱掣
唐氏一門今五龍聲華殷殷皆如鍾就中十一最年少
別有俊氣橫心胸巧綴五言才刮骨却怕柱天身硨磲
後輩無勞續出頭坳堂不合窺溟渤君家三兄舊山侶
方寸久來常許與不覺淹留兩月餘風光爛漫生洲渚
宇文文學儒家子竹繞書齋花映水醉舞狂歌此地多
有時酩酊扶還起猥蒙方伯憐飢貧假名許得陪諸賓

酒家債負有填日恣意頗敢排青繡余瞿二家同愛客
園蔬任遣奴人摘野狐泉頭銀葉方一別十年今再覲
更有風流歎奴子能將盤帕來欺爾白馬青袍豁眼明
許他真是查郎髓良會芳時難再來隙光電影長相催
扁舟惆悵人南去目斷江天凡幾回

山中五無奈何

詩一首見本集
題止山中二字

無奈落葉何紛紛滿衰草疾來無氣力擁戶不能掃欲
訪雲外人都迷上山道

無奈澗水何
喧喧夜鳴石
疎林透斜月
散亂金光滴
欲訪澗底人
路窮潭水碧

無奈阿鼎何
嬌啼索梨栗
柴門正風雨
千向千回出
欲識老病心
賴渠將過日

無奈梅花何
滿巖光似雪
春風總未至
獨自驚時節
欲見惆悵心
又看花上月

張祜

詩五首

江南雜題

積潦池新漲，頽垣址舊高。
怒蛙橫飽腹，鬬雀墮輕毛。
碧瘦三稜草，紅鮮百葉桃。
幽棲日無事，痛飲讀離騷。

賦得福州白竹扇子

探得輕字

金泥小扇謾多情，未勝南工巧織成。
藤縷雪光纏柄滑，篾鋪銀薄露花輕。
清風坐向羅衫起，明月看從玉手生。
猶賴早時君不棄，每憐初作合歡名。

潤州楊別駕宅送蔣侍御收兵歸揚州

冷氣清金虎，兵威壯鐵冠。
揚旌川色暗，吹角水風寒。
人


對輜駢醉花垂睥睨殘羨歸丞相閣空望舊門闌

觀泗州李常侍打毬

日出樹煙紅開場畫鼓雄驟騎鞍上月輕撥鐙前風斗
轉時乘勢旁指乍迸空等來低背手爭得旋分驥遠射
門斜入深排馬迴通遙知三殿下長恨出征東

閑居

僻巷新苔徧空庭弱柳垂井欄防穉子盆水試鵝兒喜
客加籩食邀僧長路棋未能拋世事除此更何為



御定全唐詩卷八百八十三

欽定四庫全書

集部

御定全唐詩卷八百八十四至七

詳校官庶吉士臣何道沖

主事銜臣徐以坤覆勘

總校官知縣臣繆琪

校對官學正臣卜惟吉

謄錄監生臣戴璵

欽定四庫全書

御定全唐詩卷八百八十四

杜牧

詩一首

渡吳江

堠館人稀夜更長
姑蘇城遠樹蒼蒼
江湖潮落高樓迥
河漢秋歸廣殿涼
月轉碧梧移鵲影
露低紅草溼螢光
文園詩侶應多思
莫醉笙歌掩華堂

厲玄

詩一首

元日觀朝

玉座臨新歲，朝盈萬國人。
火連雙闕曉，伏列五門春。
瑞雪銷鴛瓦，祥光在日輪。
天顏不敢視，稱慶拜空頻。

趙璜

詩一首

六月

六月火雲散，蟬聲鳴樹梢。
秋風豈便借，客思已蕭條。
傾國三年別，煙霞一路遙。
行人斷消息，更上灞陵橋。

喻鳧

詩一首

樊川寒食

第一句
缺一字

新松 綠草古柏翳黃沙
珮珂客驚鳥綺羅人間花
塵南北馬碾石去來車
川晚悲風動墳前碎紙斜

潘咸

詩一首

芍藥

閑來竹亭賞賞極藥珠宮
葉已盡餘翠花纔半展紅
媚欺桃李色香奪綺羅風
每到春殘日芳華處處同

劉得仁

詩五首

晚步

野步晚悠悠山光澹早秋遠空淪日脚多稼没人頭古
木蟬齊噪深塍水慢流幽居迴不近杖策却堪愁

村晚閒步

緩步出居處過原邊雁行夕陽投草木遠水映蒼茫野
寺同蟾宿雲溪斲藥膏蕭條霜景暮極目盡堪傷

冬日題興善寺崔律師院孤松

為此疎名路頻來訪遠公孤標宜雪後每見憶山中靜

影生幽蘚寒聲入迴空何年植茲地曉夕動清風

題新栽小松

滿庭蕭颯皆凡木豈得颼颼似石溪雪夜枝柯疑畫出
月中長短共人齊未知何日干天及恐到秋來被鶴棲
却向舊山尋得處白雲根蔌覓應迷

栽松

翠色凜空庭披衣獨繞行取從山頂嶮栽得道心生未
弱幽泉韻焉論別木聲霜天殘月在轉影入池清

薛瑩

詩一首

十日菊

昨日尊前折萬人
酣曉香今朝離下見
滿地委殘陽得
失片時痛榮枯
一歲傷未將同腐草
猶更有重霜

賈島

詩一首

赴南巴留別蘇臺知己

人過梅嶺上歲歲
北風寒落日孤舟去
青山萬里看猿
聲湘水靜草色洞庭寬
已料生涯事只應持釣竿

莊南傑

詩四首

紅薔薇

才調集作
無名氏詩

九天碎霞明澤國
造化工夫潛翦刻
翠葉長眉約細枝
殷紅短刺鉤春色
明日當樓晚香歇
金帶盤空已成結
謝豹聲催麥隴秋
熏風吹落猩猩血

曉歌

鷓鴣哭樹星河轉
海上金鳥翅如電
嫦娥斂髮綰雲頭
玉女舒霞織天面
九土厨煙滿城邑
商洛隴頭車馬急

魏宮鐘動繡窗明夢娥驚對殘燈立

春草歌

漠漠繇繇幾多思無言領得春風意
花栽小錦繡晴空葉抽碧簾鋪平地
含芳弔影爭芬敷繞雲恨起山靡蕪
離人不忍到此處淚娥滴盡雙真珠

古松歌

山上山下松森沈翠蓋煙龜鱗犀甲鏤支體
泉聲雨脚洗春風深碧塵尾埽冥濛淺黃龍
腹盤穹崇擎天攬地

數千戶恐作雲雨歸維嵩維嵩成大廈莫遣邂逅逢樵者

薛能

詩四首

蒲中霽後晚望

河邊霽色無人見身帶春風立岸頭濁水茫茫有何意
日斜還向古蒲州

龍門八韻

河浸華夷闊山橫宇宙雄高波萬丈瀉夏禹幾年功川

逆晴明雨林生旦暮風人看翻進退鳥性斷西東氣逐
雲歸海聲驅石落空近身毛乍豎當面語難通沸沫歸
何處盤渦傍此中從來化髻者攀去路應同

新雪

細落麤和忽復繁頓清朝市不聞喧天迷皓色風何亂
地溼春泥土半翻香暖會中懷岳寺樵鳴村外想家園
閒吟只愛煎茶澹幹破平光向近軒

送判官赴京

闕下情偏已絕稀天涯身遠復相依庭花每對從容落
夜燭多同笑語歸君子是行應柏署鄙人何望即柴扉
青雲若遇交親話白璧無心待發揮

朱景玄

詩一首

溪東岑望天都山

目望浮山丘梯雲上東岑羣峯爭入冥巉巉生太陰昔
賢此升仙結構窮聳深未曉日先照當晝色半沉風泉
雪霜飛雲樹瓊玉林大道非閉隔無路不可尋窺鏡澄

風慮望壇起敬心一從呼子安永絕金玉音

許渾

詩一首

夜行次東關

一作行次
潼關驛

逢魏扶東歸

南北斷

一作倦

蓬飄長亭酒一瓢殘雲歸太華疏雨過中

條樹色隨關迴河聲入塞

一作海

遙勞歌此分首

一作手風

急馬蕭蕭

李頻

詩二首

南遊湘漢寄友人

南去遠三京三湘五月行巴江雪水下楚澤火雲生向
野聊中飲乘涼探暮程離懷不可說已近峽猿聲

送劉山人歸洞庭

却共孤雲去高眠最上峯半湖乘早月中路入疏鐘秋
盡蟲聲急夜深山雨重當時同隱者分得幾株松

李郢

詩十首

早發

野店星河在行人道路長孤燈憐宿處斜月厭新裝草

色多寒露蟲聲似故鄉
清秋無限恨殘菊過重陽

題惠山

乳洞陰陰碧澗連
杉松六月冷無蟬
黃昏飛盡白蝙蝠
茶火數星山寂然

雨中看山榴落花

山榴逼砌栽
山火一團開
盡日風兼雨
春渠擁作堆

寄友人乞菊栽

第七句
缺一字

藥闌經雨正堪鋤
白菊煩君乞數株
潘岳賦中芳思在

陶潛籬下綠英無移來稍及蟬鳴樹種罷長教酒滿壺
子成仙縱難學九秋思看集鳩雛

江邊柳

東風晴色挂闌干眉葉初晴畏曉寒江上別筵終日有
綠條春在長應難

鵝兒

臘後間行村舍邊黃鵝清水真可憐何窮散亂隨新草
永日淹留在野田無事羣鳴遮水際爭來引頸逼人前

風吹楚澤蒹葭暮
看下寒溪逐去船

酬友人春暮寄枳花茶

昨日東風吹枳花
酒醒春晚一甌茶
如雲正護幽人漸
似雪纔分野老家
金餅拍成和雨露
玉塵煎出照煙霞
相如病渴今全校
不羨生臺白頸鴉

郢自街西醉歸馬
鞭墜失崔員外起
祕書知其闕用皆
許見貽俄頃之間
二信俱至短長堅
重價不相饒輒抒
短章仰酬珍錫

蜀巖陰面冷冥冥偃雪欺霜半露青
鉅刃剪裁多鵲媚
細鞘揮拂帶龍腥
崖垂萬仞知無影
蘚漬千年合有靈
蘭省貴寮蓬閣吏
一時緘贈到雲亭

即目

自笑騰騰者非慙
又不狂何為跼似鼠而復怯於麀
落拓無生計伶俜戀酒鄉
冥搜得詩窟偶戰出文場
愛雪愁冬盡懷人覺夜長
石樓多爽氣檉案有餘香
運去非關拙時來不在忙
平生兩閑暇孤趣滿滄浪

羅敷東館亭下流泉云至前山擁咽經歲移時
掬弄惆悵成章

看山亭下小鳴泉鳴咽難通亦可憐惆悵無人為踈鑿
擁愁含恨過年年

于武陵

詩一首

白櫻樹

記得花開雪滿枝和逢和蝶帶花移如今花落遊蜂去
空作主人惆悵詩

崔櫓詩二十
一首

過南城縣麻姑山

似前如却玉堆堆薄帶輕煙翠
好裁斜倚兔鉤孤影伴
校低仙掌一頭來盤疑虎伏形難寫
展認龍拏勢未迴
驚訝昔人曾羽化此中爭不接瑤臺

詩手難題畫手慙淺青
濃碧疊東南塵愁世界忙心在
霞伴神仙穩夢酣雨涕自悲看雪鬢
星冠無計整雲簪
家風負荷須名宦可惜千峯綠似藍

差煙危碧半斜暉何代仙人此羽飛高袖鎮長寒柏暗
古祠時復彩雲歸紅塵鞭馬顏將換碧落驂鸞意有違
聲利繫身家繫念今生辜負六銖衣

和友人題僧院薔薇花三首

何人移得在禪家瑟瑟枝條簇簇霞爭那寂寥埋草暗
不勝惆悵舞風斜無緣影對金尊酒可惜香和石鼎茶
看取老僧齊物意一般拋擲等凡花

忍委芳心此地開似霞顏色苦低迴風驚少女偷香去

雨認巫娥覓伴來今日獨憐僧院種舊山曾映釣磯栽
三清上客知惆悵勸我春醪一兩杯

露香如醉態如慵斜壓危闌草色中試問更誰過野寺
無繆徒自舞春風蘭缸尚惜連明在錦帳先愁入夏空
一日幾回來又去不能容易捨深紅

春晚泊船江村

芳草青青古渡頭漁家住處暫維舟殘花半樹悄無語
細雨滿天風似愁家信不來春又晚客程難盡水空流

自憐愛失心期約看取花時更遠遊

柳

風慢日遲遲拖煙拂水時惹將千萬恨繫在短長枝骨
軟張郎瘦腰輕楚女飢故園歸未得多少斷腸思

蓮花

影歌晴浪勢歌煙恨態緘言日抵年輕霧曉和香積飯
片紅時隨化人船人間有筆應難畫雨後無塵更好憐
何限斷腸名不得倚風嬌怯醉腰偏

殘蓮花

第二首一
作張林詩

倚風無力減香時
涵露如啼卧翠池
金谷樓前馬嵬下
世間殊色一般悲

不耐高風怕冷煙
瘦紅欹委倒青蓮
無人解把無塵袖
盛取殘香盡日憐

惜蓮花

半塘前日染來紅
瘦盡金方昨夜風
留樣最嗟無巧筆
護香誰為惜熏籠
緣停翠櫂沈吟看
忍使良波積漸空

魂斷舊溪顚，態冷煙殘粉。
楚臺東

岳陽雲夢亭看蓮花

似醉如慵一水心，斜陽欲暝彩雲深。
清明月照羞無語，涼冷風吹勢不禁。
曾向楚臺和雨看，只於吳苑弄船尋。
當時為汝題詩徧，此地依前泥苦吟。

村路菊花

裊風驚未定，溪影晚來寒。
不得重陽節，虛將滿把看。
神仙誰采掇，煙雨惜彫殘。
牧豎樵童看，應教愛爾難。

題山驛新桐花

雨餘煙膩暖香浮
影暗斜陽古驛樓
丹鳳總巢阿閣去
紫花空映楚雲愁
堪憐翠蓋奇於畫
更惜芳庭冷似秋
長日老春看落盡
野禽閑哢碧悠悠

山路木芙蓉

不向橫塘泥裏栽
兩株晴笑碧巖隈
枉教絕世深紅色
只向深山僻處開
萬里王孫應有恨
三年賈傅惜無才
緣花更歎人間事
半日江邊悵望迴

新柳

無情柔態任春催似不勝風倚古臺多少去年今日恨
御溝顏色洞庭來

臨川見新柳

不見江頭三四日橋邊楊柳老金絲岸南岸北往來渡
帶雨帶煙深淺枝何處故鄉牽夢想兩迴他國見榮衰
汀洲草色亦如此愁殺遠人人不知

南陽見柳

夜來風入最高枝，
胃斷愁腸幾尺絲。
楚塞曾吟煙午處，
曲江長憶雪晴時。
金銜細轂縈廻岸，
戍笛牛歌遠近陂。
還把舊年惆悵意，
武安城下一吟詩。

別君山

點空誇黛妬，
愁眉何必浮。
來結夢思慙，
媿二年青翠色。
惹窗粘枕伴，
吟詩。

宿壽安山陰館聞泉

一支清急萬山來，
穿竹喧飛破石苔。
夢在故鄉臨欲到，

聲聞孤枕却驚迴多愁鬢髮余甘老有限年光爾莫催
緣憶舊遊相似處月明山響子陵臺

劉綺莊

詩一首

共佳人守歲

桂花窮北陸荆豔作

一作下

東鄰殘妝欲送曉薄衣已迎

春舉袖爭流雪分歌競繞

一作曉

塵不應將共醉年去遠

催人

御定全唐詩卷八百八十四

欽定四庫全書

御定全唐詩卷八百八十五

皮日休

詩五首

櫻桃花

婀娜枝香拂酒壺
向陽疑是不融酥
晚來嵬我渾如醉
惟有春風獨自扶

夜看櫻桃花

纖枝瑤月弄圓霜
半入隣家半入牆
劉阮不知人獨立

滿衣清露到明香

詠白蓮

膩於瓊粉白於脂
京兆夫人未畫眉
靜婉舞偷將動處
西施顰效半開時
通宵帶露妝難洗
晝日凌波步不移
願作水仙無別意
年年圖與此花期

細嗅深看暗斷腸
從今無意愛紅芳
折來只合瓊為客
把種應須玉甃塘
向日但疑酥滴水
含風渾訝雪生香
吳王臺下開多少
遙似西施上素妝

赤門堰白蓮花

縞帶與綸巾輕舟漾赤門
千迴紫萍岸萬頃白蓮村
荷露傾衣袖松風入髻根
蕭疎今若此爭不盡餘尊

司空圖

詩十首

丙午歲旦

雞報已判春中年抱疾身
曉催庭火暗風帶寺幡新
多慮無成事空休是吉人
梅花浮壽酒莫笑又移巡

丁巳元日

第三十八句缺一字

稟朔華夷會開春氣象生日隨行闕近嶽為壽觴晴作
睿由稽古昭仁事措刑上元勞眷佑高廟保忠貞星變
當移幸人心喜奉迎傳呼清御道雪涕識臣誠鼎鼐和
方濟台階潤欲平扶天咨協力併日召延英金躍洪鑪
動雲驅衆蟄驚關中留王氣席上縱奇兵累降搜賢詔
兼持進善旌短轅收驥步直路發鵬程自乏匡時畧非
沾矯俗名鶴籠何足獻蝸舍別無營羸帶漳濱病吟哀
越客聲移居荒藥圃耗志在棋枰醉忘身空老書憐眼

尚明偶能甘蹇分豈是薄浮榮慮戒防微淺
知近利
輕獻陵三百里寤寐禱時清

光啟三年人日逢鹿

浮世仍逢亂安排賴佛書勞生中壽少抱疾上昇疎日
暖人逢鹿園荒雪帶鋤知非今又過遽瑗最憐渠

浙上重陽

第二句
缺一字

登高唯北望菊助可
明離恨初逢節貧居只喜晴好
文時可見學稼老無成莫歎關山阻何當不阻兵

乙巳歲愚春秋四十九辭疾拜章將免左掖重
陽獨登上方

雪鬢不禁鑷知非又此年退居還有旨榮路免妨賢落
照鳴蛩候晴霞度雁天自無佳節興依舊菊籬邊

重陽山居

此身逃難入鄉關八度重陽在舊山籬菊亂來成爛漫
家僮常得解登攀年隨厯日三分盡醉伴浮生一片閑
滿目秋光還似鏡殷勤為我照衰顏

旅中重陽

乘時爭路抵危身，經亂登高有幾人。
今歲節唯南至在，舊交墳向北邙新。
當歌共惜初筵樂，且健無辭後會頻。
莫道中冬猶有閨，蟬聲繞盡即青春。

南至日

第一句
缺二字

年年山來頻，莫強孤危競要津。
吉卦偶成開病眼，暖簷還葺寄羸身。
求仙自躁非無藥，報國當材別有人。
鬢髮堪傷白已遍，鏡中更待白眉新。

五月九日

金石皆銷鑠賢愚共網羅
達從詩似偈狂覺哭勝歌
高燕凌鴻鵠枯槎壓芰荷
此中無別境此外是閑魔

庚子臘月五日

複道朝廷火嚴城夜漲塵
驂騑思故第鸚鵡失佳人
禁漏虛傳點妖星不振辰
何當迴萬乘重覩玉京春

羅隱詩一首

中元夜看月

朦朧南溟月，湧出雲濤下。
射長鯨，眼遙分玉兔。
毫勢來牛斗，動路越窅冥。
高竟夕，瞻光影，昂頭把白醪。

唐彥謙

詩十
一首

木蘭

衆花搖落正無憀，脉脉芳叢契後凋。
舒卷綠苞臨小檻，剪裁檀的綴長條。
獨當春盡情何限，尚有秋期別未遙。
桃葉近來消息絕，見君長憶渡江橈。

玉蘂

玉藥兩高樹相輝松桂旁向來塵不雜此夜月仍光秀
掩叢蘭色豔吞穠李芳世人嫌其美何必更清香

蓮

新蓮映多浦迢遞綠塘東靜影搖波日寒香映水風金
塵飄落藥玉露洗殘紅看著餘芳少無人問的中

望岳時賊據華夏

長路風埃隔楚氛忽驚神岳映朝暉削成絕壁五千仞
高揖泥金七十君祝史祕辭今莫睹從臣嘉頌久無聞

幽人間望封中地好為吾皇起白雲

片石

小齋廬阜石寄自沃洲僧山客勞攜笈幽人自得朋
瘦雲低作段野浪凍成冰便可同清話何須有物憑

柳

春風向楊柳能事盡風流有意疑張緒無情見莫愁
依然金谷在寧免武昌偷前路難回首何須苦映樓

垂柳

垂柳碧孱茸樓舳帶雨容思量成畫夢來去發春慵梳
洗憑張敞乘騎笑稚恭碧虛從轉笠紅燭近高春怨臉
明秋水愁眉淡遠峰小園花盡蝶靜院酒醒蛩倦作琴
臺鳳今為藥店龍寶奩拋擲久一任景陽鐘

紫薇花

素秋寒露重芳事固應稀小檻臨清沼高叢見紫薇溫
廬終有思暗淡豈無輝見欲迷交甫誰能狀宓妃妝新
猶倚鏡步緩不勝衣恍似新相得俚如久未歸又疑神

女過猶佩七香幃還似星娥織初臨五綵機慶雲今已
集威鳳莫驚飛綺筆題難盡煩君白玉徽

望中條

第四句
缺三字

虞鄉縣西郭改觀揖中條第蓄終南小交

遙崦

深應有寺峰近恐通橋為語前村叟他時寄採樵

蒙穀山

蒙穀山低碧海枯仲君閒坐說麻姑遙天鶴語知虛實
長夜神光竟有無祕祝齋心開九轉侍臣回首聽三呼

交朋漫信文成術短燭瑤壇漏滿壺

菊

雪菊金英兩斷腸蝶翎蜂鼻帶清香寒村宿霧臨幽徑
廢苑斜暉傍短牆近取松筠為伴侶遠將桃李作參商
年來病肺疎杯酒每憶龍山似故鄉

方干

詩一首

山中

愛山却把圖書賣嗜酒空教僮僕賒祗向堦前便漁釣

那知枕上有雲霞
暗泉出石飛仍咽
小徑通橋直復斜
窗竹未抽今夏笋
庭梅曾試當年花
姓名未及陶弘景
髭鬢白於姜子牙
松月水煙千古在
未知終久屬誰家

王駕詩一

首

次韻和盧先輩避難寺居看牡丹

亂後寄僧居看花
恨有餘香宜間靜
立態似別離初朶
密紅相照欄低畫
不如狂風任吹却
最共野人疎

杜荀鶴詩一

首

春宮怨

早被嬋娟誤欲妝
臨鏡慵承恩不在貌
教妾若為容
風暖鳥聲碎日高花影重
年年越溪女相憶採芙蓉

翁承贊

詩一首

晨興

鼓絕天街冷霧收
曉來風景已堪愁
槐無顏色因經雨
菊有精神為傍秋
自愛鮮飈生戶外
不教閒事住心頭
披襟徐步一蕭灑
吟繞盆池想狎鷗

王貞白

詩十
二首

江上吟曉

一葉野人舟長將載酒游夜來吟思苦江上月華秋曉
露滿紅蓼輕波颺白鷗漁翁似有約相伴釣中流

過商山

一宿白雲根時經採麝村數峰雖似蜀當畫不聞猿馬
立溪沙淺人爭閣道喧明朝棄襦罷步步入金門

泛鏡湖

題缺
二字

我泛鏡湖日未生千里尊時無賀賓客誰識謫仙人吟
對四時雪憶遊三島春惡聞亡越事洗耳大江濱

太湖石

誰憐孤峭質移在太湖心出得風波外任他池館深不
同花逞豔多媿竹垂陰一片至堅操那憂歲月侵

依韻和幹公題庭中太湖石二首

山立祗盈尋高竒藥圃陰風濤打欲碎巖穴蟄方深
點晴偏綠蛩藏曉競吟歲寒終不變堪比古人心

徒勞水府尋宛在玉堂陰
蘭圃安雖窄盆池映轉深
山僧來盡愛詩客見先吟
若是買花者年年不計心

書陶潛醉石

片石陶真性非為麴蘖昏
爭如累月醉不笑獨醒人
積疊莓苔色交加薜荔根
至今重九日猶待白衣魂

看天王院牡丹

前年帝里探春時寺寺名花
我盡知今日長安已灰燼
忍隨南國對芳枝

芍藥

芍藥承春寵何曾羨牡丹
麥秋能幾日穀雨只微寒
妬態風頻起嬌妝露欲殘
芙蓉浣紗伴長恨隔波瀾

獨芙蓉

方塘清曉鏡獨照玉容秋
蠹菱不相採歛蘋空自愁
日斜還顧影風起強垂頭
芳意羨何物雙雙鸕鷀游

馮氏書齋小松二首

孤根生遠岳移植翠枝添
自秉雪霜操任他蜂蝶嫌
微

陰連迴竹清韻入疎簾聳勢即空碧時人看莫厭

得地已經歲清音晝夜聞根涵舊山土葉間近溪雲野
鶴望長遠庭花笑不羣須知搖落後衆木始能分

張蠩詩一
首

社日村居
一作張演詩

鷺湖山下稻梁肥
犂犂雞棲對掩扉
桑柘影斜春社散
家家扶得醉人歸

盧延讓詩三
首

八月十六夜月

十六勝三五中天照大荒
祗緣些子訛應號沒多光
桂老猶全在蟾深未煞忙
難期一年事到曉泥詩章

冬除夜書情

兀兀坐無味思量誰與隣
數星深夜火一箇遠鄉人
雁翥天微雪風號樹欲春
愁章自難過不覺苦吟頻

觀新歲朝賀

龍墀初立仗鴛鴦列班行
元日燕脂色朝天樺燭香表

章堆玉案繒帛滿牙牀三百年如此無因及我唐

御定全唐詩卷八百八十五

欽定四庫全書

御定全唐詩卷八百八十六

曹松

詩九首

中秋月

九十日秋色今秋已十分孤光吞列宿四面絕微雲
衆木排疎影寒流疊細紋遙遙望丹桂心緒更紛紛

寄方干

以下皆見元人錄本唐人詩賦

桐廬江水閒終日對柴關因想別離處不知多少山
釣

舟春岸濶

一作泊

庭樹晚煙

一作鶯

還莫便求棲隱桂枝堪

恨顏

宿山寺

溪山盡日行方聽
遠鐘聲入院逢僧定
登樓見月生
露垂羣木潤
泉落一巖清
此景關吾事
通宵寐不成

冬日登江樓

高樓臨古岸
野步晚來登
江水因寒落
山雲為雪凝
遠村雖入望
危檻不堪凭
親老未歸去
鄉愁徒自興

寄李處士

僧話磻溪叟平生重赤松夜堂悲蟋蟀秋水老芙蓉吟

坐倦垂釣閒行多倚筇聞名來已久未得一相逢

一作何日

逢一相

客中立春

玉燭傳佳節陽和應此辰土牛呈歲稔綵燕表年春臘
盡星回次寒餘月建寅梅花將柳色偏思越鄉人

南塘暝興

水色昏猶白霞光暗漸無風荷搖破扇波月動連珠蟋蟀啼相應鴛鴦宿不孤小僮頻報夜歸步尚踟躕

送鄭谷歸宜春

無成歸故國上馬亦高歌況是飛鳴後殊為喜慶多暑消嵩岳雨涼吹洞庭波莫使閒吟去須期接盛科

送曾德邁歸寧宜春

湘東山川有清輝素水詞人得意歸幾府爭馳毛義檄一鄉看侍老萊衣筵開灞岸臨清淺路去藍關入翠微

想到宜陽更無事併將歡慶奉庭闈

李洞

詩一首

山泉

半空飛下水勢去響如雷靜徹啼猿寺高凌坐客臺耳
同經劒閣身苦到天台澣樹吹成凍凌祠觸作灰深中
試榔栗淺處落莓苔半夜重城閉潺湲枕上一作底來

盧士衡

詩二首

松

雲外千尋好性靈伴杉陪柏事孤貞招呼暑氣終無分
應和涼風別有聲細雨灑時花旋落道人食處葉重生
如逢郢匠垂搜採為棟為梁力不輕

再遊紫陽洞重題小松

仙家種此充朝食葉葉枝枝造化力去年見時似鶴高
今年蕭騷八九尺不同矮檜終安地定向晴空倚天碧
好期逸士統貞根昂枝點破秋苔色尋思凡眼重花開
寧知此木超塵埃祇是十年五年間堪作大廈之宏材

熊皎詩六
首

湘江曉望

笙歌歡罷散離筵
水色朦朧蘸宿煙
山響疎鐘何處寺
火光收釣下灘船
微雲過鳥侵微月
古岸平江浸遠天
歸夢已闌風色動
孤帆仍要住無緣

早行

結束何妨早將行
四顧頻山前猶見月
陌上未逢人遠
樹動宿鳥危橋怯
病身漸明恒自慰
應免復迷津

遊嵩山

獨背焦桐訪洞天，暫攀靈迹棄塵緣。
深逢野草皆疑藥，靜見樵人恐是仙。
翠木入雲空自老，古碑橫水莫知年。
可憐幽景堪長往，一任人間歲月遷。

九華望廬山

九江山勢盡崢嶸，惟有匡廬最得名。
萬疊影遮殘雪在，數峰嵐帶夕陽明。
冷侵醉榻鋪秋色，高亞吟龍送水聲。
只待丹青酬志了，白雲深處是歸程。

道傍松

第五句
缺一字

偃蓋當衢莫記年
獨含蒼翠鶴應憐
垂陰獨向笙歌地
有韻自成風雨天
塵路岐分夜月燒
侵根脚起殘煙
論功只合行人賞
銷得煩蒸古道邊

月中桂

斫破重輪種者誰
銀蟾何事便相隨
莫言望夜無攀處
却是吟人有得時
孤影不凋清露滴
異香常在好風吹
幾回目斷雲霄外
未必姮娥惜一枝

孫魴

詩二十
八首

湖上望廬山

輟櫂南湖首重迴
笑青吟翠向崔嵬
天應不許人全見
長把雲藏一半來

題梅嶺泉

梅嶺舊聞傳林亭
勢巖然登臨真不易
幽勝恐無先楚
野平千里吳江曲
一邊標形都大別
洞府豈知焉飛閣
橫空去征帆落面
前南雄雉堞峻北
壯鳳臺連爛漫三

春媚參差百卉妍
風挑諸處錦洛竹
半溪煙燕入晴梁
語鶯從暖谷遷石
根朝靄碧簾際晚
霞鮮逕柳行難約
庭莎醉好眠清明
時更異造化意疑
偏不獨宜韶景尤
須看暑天藥苗絲
似結蘿蔓猛如編
珠亞垂枝果冰澄
汲井泉粉牆蛸蛻
落丹檻雀雛顛炎
氣微茫覺清飈左
右穿雲峰從勃起
葵葉豈勞扇又見
秋天麗渾將夏日
懸紅黥著霜樹香
老卧池邊菱芡誰
鋪繡莓苔自學錢
暗蟲依砌響明月
逗簾圓小砌滋新
菊高軒噪暮蟬雨

聲寒颯颯雁影曉聯聯釋此何堪玩深冬更可憐窗中
看短景樹裏見重川岡阜分明出杉松氣概全謳成白
雪曲吟是早梅篇剗制誰人解根基太守賢或時留皂
蓋盡日簇華筵雅詠憂黎庶狂遊泥管弦交加豐玉食
來去迸金船侍從非常客俳諧像列仙畫旗張赫奕妖
妓舞嬋娟罷宴心猶戀將歸興尚牽祗應愁逼夜寧厭
賞經年孤賤今何幸躋攀奈有緣展眉驚豁達徐步喜
周旋諷詠雖知苦推功靡極玄聊書四十韻甘責未精

專

廬山瀑布

有山來便有萬丈落雲端霧噴千巖濕雷傾九夏寒
圖中僧寫去湖上客迴看却羨為猿鶴飛鳴近碧湍

牡丹

意態天生異轉看看轉新百花休放豔三月始為春
蝶死難離檻鶯狂不避人其如豪貴地清醒復何因

主人司空後亭牡丹

佳卉挺芳辰天容乃絕倫望開從隔歲愁過即無春體
物真英氣餘花似庶人蜂攢知眷戀鳥語亦殷勤況在
豪華地寧同里巷塵酷憐應喪德多賞奈怡神忌穢栽
時土嘗甜折處津繞行那識倦圍坐豈辭頻入夢殊巫
峽臨池勝洛濱樂喧絲雜竹露漬卯連寅飲興尤思滿
吟情自合新怕風惟怯夜憂雨不經旬欄檻為良援亭
臺是四鄰雖非能伐性爭免礙還淳關豔何慚蜀矜繇
未讓秦私心期一日許近看逡巡

看牡丹二首

莫將紅粉比穠華
紅粉那堪比此花
隔院聞香誰不惜
出欄呈豔自應誇
北方有態須傾國
西子能言亦喪家
輸我一枝和曉露
真珠簾外向人斜

看花長到牡丹月
萬事全忘自不知
風促乍開方可惜
雨淋將謝可堪悲
間年對坐渾成偶
醉後拋眠恐負伊
也擬便休還改過
迢迢爭奈一年期

題未開牡丹

青苞雖小葉雖疎貴氣高情便有餘
渾未盛時猶若此
算應開日合何如尋芳蝶已棲
丹檻襯落苔先染石渠
無限風光言不得一心留在暮春初

主人司空見和未開牡丹輒却奉和

把筆臨芳不自怡
首徵章句促妖期
已驚常調言多鄙
遽捧高吟媿可知
絕代貞名應愈重
千金方笑更難移
狂歌狂醉猶堪羨
大拙當時是老時

又題牡丹上主人司空

一年芳勝一年芳
愛重賢侯意異常
手闌紅房看潤狹
自張青幄蓋馨香
白疑美玉無多潤
紫覺靈芝不是祥
祇恐夢徵他日去
又須疑向鳳池傍

牡丹落後有作

未發先愁有一朝
如今零落更魂銷
青叢別後無多色
紅線穿來已半焦
蓄恨綺羅猶眷眷
薄情蜂蝶去飄飄
明年雖道還期在
爭奈憑欄乍寂寥

柳絮詠

年年三月裏隨處自悠揚
雨過渾疑盡風來特地狂
入花蜂有礙遮水燕無妨
若是添離思青門道路長

甘露寺紫薇花

蜀葵鄙下蕪全落
菡萏清高且未開
赫日迸光飛蝶去
紫薇擎豔出林來
聞香不稱從僧舍
見影尤思在酒杯
誰笑晚芳為賤劣
便饒春麗已塵埃
牽吟過夏惟憂盡
立看移時亦忘迴
惆悵寓居無好地
嬾能分取一枝栽

芳草

何處不相見
煙苗捧露心
萋萋綠遠水
冉冉在空林
野吹閒搖濶
遊人醉卧深
南朝古城裏
碑石又應沈

春苔

底物最牽吟
秋苔獨自尋
何時連夜雨
墨翠滿松陰
湘岸荒祠靜
吳宮古砌深
侯門還可惜
長被馬蹄侵

老松

第三句
缺一字

鬱鬱復蒼蒼
秋風韻更長
空心應有老
葉不知霜
子落生深澗
陰清背夕陽
如逢東岱雨
猶得覆秦王

柳十一
首

龍葱二月初青軟自相紆意態花猶少風流木更無影
繇晴陌上煙重古城隅煬帝河聲裏幾番榮又枯

數樹新栽在畫橋春來猶自長長條東風多事剛牽引
已解纖纖學舞腰

金堤堤上一林煙況近清明二月天別有數枝遙望見
畫橋南面拂鞦韆

春物牽情不奈何就中楊柳態難過也知是處無花去

爭奈看時未覺多

小眉初展綠條稠
露壓煙濛不自由
莫是折來偏屬意
依稀相似是風流

九衢春霽濕雲凝
着地穆穆礙馬行
擬折無端拋又戀
亂穿來去羨黃鶯

千樹陰陰蓋御溝
雪花金穗思悠悠
先朝事後應無也
惟是荒根逐碧流

搖蕩和風恃賴春
醺流遮路逐年新
顛狂絮落還堪恨

分外欺凌寂寞人

暖催春促吐芳芽伴雨從風處處斜
莫道玄功無定配
不然爭得見桃花

小池前後碧江濱
翠拋青爛漫春
不是和風為擡舉
可能開眼向行人

深綠依依配淺黃
兩般顏色一般香
到頭嫋娜成何事
祇解年年斷客腸

看桑

簇簇牙相遮閒看實可嗟藉多雖是葉栽盛不如花春
綠暗連麥秋乾暮立鴉舊鄉曾種得經亂屬誰家

劉昭禹

詩五
首

僊都山留題

林下事無非塵中竟不知白雲深擁我青石合眠誰山
靜擣靈藥夜閒論古詩此來親羽客何日變枯髭

晚霽望嶽麓

湘西斜日邊峭入幾尋天翠落重城內屏開萬戶前崖

峻危濺瀑林罅靜通仙誰冒功成後相攜掃石眠

石筍

千古海門石移歸吟叟居竅腥蛟出後形瘦浪衝餘工
語寧無玉僧知忽有書好期仙者叱變化向庭隅

傷雨後牡丹

廢功看不已醉起又持杯數日簾常卷中宵雨忽來淒
涼無戲蝶零落在蒼苔造化根難問令人首可迴

送人紅花栽

世上紅蕉異因移萬里根艱難離瘴土瀟灑入朱門葉
戰青雲韻花零宿露痕長安多未識誰想動吟魂

劉乙

詩二首

曉望

地祇逃秀境神化或殷雷裂漢媧補合高峰劒躍開即
今新定業何世不遺才若是浮名道須言有禍胎

山中早起

難調扶桑枝秋空隱少微濶雲霞並曜高日月爭輝若

厥開天道同初發帝機以言當代事聞闢紫宸扉

姚揆詩二

首

晚步

陋巷貧疑本姓顏晚來閑步出林間數聲長笛吹沈日
一片殘雲點破山島寺漸疎敲石磬漁家方半掩柴關
遲迴從此搜吟久待得溪頭月上還

秋日江東晚行

迢迢驅馬過江東此際令人恨莫窮一撮秋煙堤上白

半輪殘日嶺頭紅
路岐滋味猶如舊
鄉曲聲音漸不同
含思看看到梁苑
畫樓絲竹徹遙空

陳光
首詩二

題陶淵明醉石

片石露寒色
先生遺素風
醉眠芳草合
吟起白雲空
道出乾坤外
聲齊日月中
我知彭澤後
千載與誰同

長安新柳

九陌雲初霽
皇衢柳已新
不同天苑景
先得日邊春色

淺微含露絲輕未惹塵一枝方欲折歸去及茲晨

楊凝式

詩一首

春來冰未泮冬至雪初晴為報方袍客豐年瑞已成

御定全唐詩卷八百八十六